

zu Jerusalem Hananja der son der Apoteker / vnd sie baweten aus zu Jerusalem bis an die gebawet etc. breite mauren. Neben jm bawete Kephaja / der son Hur / der Oberst des halben viertels zu Jerusalem. Neben jm bawete Jedaia / der son Harumaph / gegen seinem hause vber. Neben jm bawete Hattus / der son Hasabemja. Aber Malchia der son Harim / vnd Hasub der son PahathMoab / baweten zwey stücke / vnd den Thurn bey den ofen. Neben jm bawete Sallum / der son Haslohes / der Oberst des halben viertels zu Jerusalem / er vnd seine Töchter.

Das Thalthor bawet Hanun / vnd die bürger von Sanoah / Sie baweten vnd setzten ein seine thür / schlösser vnd rigel / vnd tausent ellen an der mauren / bis an das Mistthor. Das Mistthor aber bawet Malchia der son Rechab der Oberst des viertels der Weingertner / Er bawet es / vnd setzet ein seine thür / schlösser vnd rigel. Aber das Brunthor bawete Sallum der son Chalhose / der Oberst des viertels zu Mizpa / Er bawets vnd deckets / vnd setzet ein seine thür / schlösser vnd rigel. Dazu die mauren am teich Seloah bey dem garten des Königs / bis an die stufen / die von der stad David erab gehen. Nach jm bawet Nehemja / der son Asbuk / der Oberst des halben viertels zu Bethzur / bis gegen die greber David vber / vnd bis an den teich Asuja / vnd bis an das haus der Helden.

Nach jm baweten die Leuten / Rehum der son Bani. Neben jm bawete Hasabja der Oberst des halben viertels zu Kegila in seinem viertel. Nach jm baweten ire brüder Bauai der son Henadad / der Oberst des halben viertels zu Kegila. Neben jm bawete Eser / der son Jesua / der Oberst zu Mizpa / zwey stück den winckel hin an / gegen dem Harnischhaus. Nach jm auff dem berge bawete Baruch / der son Sabai / zwey stücke im winckel / bis an die Hausthür Eliasib des Hohenpriesters. Nach jm bawete Meremoth der son Uria / des sons Hakoz / zwey stück / von der hausthür Eliasib / bis ans ende des hauses Eliasib.

Nach jm baweten die Priester / die menner aus den gegenten. Nach dem bawete Ben Jamin vnd Hasub gegen irem hause vber. Nach dem bawete Asarja der son Maeseja / des sons Ananja neben seinem hause. Nach jm bawete Benui der son Henadad / zwey stücke vom hause Asarja bis an den winckel / vnd bis an die ecken. Palal der son Vsai / gegen dem winckel vnd dem Hohenthurn der vom Königs hause er aus sihet / bey dem Kerckerhofe. Nach jm Pedaia / der son Pareos. Die Nethinim aber woneten an Ophel / bis an das Wasserthor / gegen morgen / da der thurn er aus sihet. Nach dem baweten die von Chefoa zwey stück gegen dem Grossenthurn / der er aus sihet / vnd bis an die mauren Ophel.

Aber von dem Rosthor an baweten die Priester / ein jglicher gegen seinem hause. Nach dem bawete Zadok der son Immer / gegen seinem hause. Nach jm bawete Semaja / der son Sachanja der Thorhüter gegen morgen. Nach jm bawete Hananja / der son Selemja / vnd Hanun der son Salaph der sechste / zwey stück. Nach jm bawete Mesullam der son Berechja gegen seinem kasten. Nach jm bawete Malchia / der son des Goldschmids / bis an das haus der Nethinim vnd der Kremer / gegen dem Ratsthor / vnd bis an den Saal an der ecken. Vnd zwischen dem Saal an der ecke zum Schasthor / baweten die Goldschmide vnd die Kremer.

III.



Aber Saneballat höret / das wir die mauren baweten / ward er zornig vnd seer entrüstet / vnd spottet der Jüden / vnd sprach fur seinen brüdern vnd den Mechtigen zu Samaria. Was machen die ammechtigen Jüden? Wird man sie so lassen? Werden sie opffern? Werden sie es einen tag volenden? Werden sie die steine lebendig